

BOSNA I HERCEGOVINA  
FEDERACIJA BOSNE I HERCEGOVINE  
PARLAMENT FEDERACIJE  
DOM NARODA  
Broj: 02-02-1447/11  
Sarajevo, 10.11.2011. godine

## Z A P I S N I K

### 6. SJEDNICE DOMA NARODA PARLAMENTA FEDERACIJE BOSNE I HERCEGOVINE, održane 10. novembra 2011. godine

Sjednica je počela u 10.56.

Sjednici je predsjedavala Karolina Pavlović, predsjedavajuća Doma naroda Parlamenta Federacije BiH.

Na početku sjednice predsjedavajuća je pozdravila premijera Federacije Nermina Nikšića, zamjenike premijera Desnicu Radivojevića potpredsjednika Federacije Svetozara Pudarića, ministre u Vladi Federacije BiH, delegate, predstavnike nevladinih organizacija i predstavnike akreditiranih medijskih kuća koji prate rad sjednice.

Izostanak sa sjednice opravdao je Slaviša Mihajlović.

Na osnovu evidencije Stručne službe, predsjedavajuća je konstatovala da sjednici prisustvuje 51 delegat, što čini većinu, te Dom naroda može raditi i punovažno odlučivati.

Nakon toga predsjedavajuća je dala na glasanje Zapisnik 5. sjednice Doma naroda.

Na osnovu rezultata glasanja, predsjedavajuća je konstatovala da je Dom naroda Parlamenta Federacije BiH, bez primjedbi (41 glas za i sedam uzdržanih glasova), usvojio Zapisnik 5. sjednice Doma naroda Parlamenta Federacije BiH, održane 15. i 22.09.2011. godine.

Predsjedavajuća je podsjetila delegate da na osnovu člana 104. Poslovnika o radu Doma naroda mogu postavljati delegatska pitanja i pokretati inicijative, te izraziti nezadovoljstvo dobijenim odgovorom.

#### **Delegatska pitanja i inicijative**

**Amir Zukić** je izjavio da nije dobio pisani odgovor na inicijativu koja se odnosi na formiranje agencije za sport.

Postavio je pitanje u vezi sa visinom primanja koju ostvaruju menadžeri u javnim preduzećima u vlasništvu države. Zatražio je da se javnost upozna sa ovim primanjima.

**Damir Čardžić** postavio je pitanje Federalnom ministarstvu poljoprivrede, vodoprivrede i šumarstva u vezi sa unapređenjem brzine isplate poticaja proizvođačima mlijeka u Federaciji BiH.

**Dževad Rađo** pokrenuo je inicijativu za stavljanje van snage Uredbe o prihodovnom cenzusu za korisnike prava na osnovu ratnih priznanja i odlikovanja.

**Elvira Abdić-Jelenović** je postavila dva pitanja.

Prvo pitanje je postavila Federalnom ministarstvu prometa i komunikacija i Ministarstvu komunikacija i prometa BiH a odnosi se na poduzete mjere s ciljem rješavanja zastoja na graničnom prijelazu Maljevac. Upitala je i šta je službeno obrazloženje Republike Hrvatske za višesatna čekanja na ovom graničnom prijelazu. Također je zatražila podatke o broju ličnih i privrednih prijelaza na pojedinim graničnim prijelazima sa Republikom Hrvatskom.

Drugo pitanje je postavila Vladi Federacije BiH, Agenciji za privatizaciju Kantona Sarajevo i Općinskom sudu u Sarajevu a odnosi se na promjenu vlasništva na parceli broj 68 koja je upisana u zk uložak 98/38 u katastarskoj Općini Sarajevo. Upitala je kolika je procijenjena vrijednost poslovnog centra koji je izgradio "Agrokomerc" d.d. Velika Kladaša, a u kojem danas djelatnost obavlja čevabdžinica "Hodžić". Također je upitala da li je, pod kojim uvjetima i na osnovu koje odluke izvršena prodaja ovog poslovnog centra te kakav interes "Agrokomerca" je ispunjen ovom prodajom. Zatražila je odgovore u pisanoj formi.

**Predrag Kojović** pokrenuo je inicijativu kojom je zatražio od Vlade Federacije BiH da u Nacrtu Budžeta za 2012. godinu predvidi sredstva za izgradnju zgrada u kojima će svoja sjedišta imati institucije Federacije BiH.

**Slobodan Tomić** je postavio dva pitanja.

Prvo pitanje je postavio Federalnom ministarstvu poljoprivrede, vodoprivrede i šumarstva u vezi sa sprečavanjem zloupotreba kod isplate poticaja.

Drugo pitanje uputio je RTVFBiH a tiče se neuvrštavanja Širokog Brijega kao kantonalnog centra na metereološku kartu Bosne i Hercegovine.

**Segmedina Srna-Bajramović** postavila je pitanje da li je Kolegij Doma naroda razmatrao dopis kojim su delegati iz reda ostalih zatražili da se njihovom predstavniku omogući prisustvo sjednicama Kolegija radi bolje koordinacije i uključenosti u rad Doma naroda.

Predsjedavajuća Doma naroda Karolina Pavlović odgovorila je da prisustvo delegata iz reda ostalih Kolegiju nije definirano Poslovníkom o radu Doma naroda, te da će joj se dostaviti odgovor u pisanoj formi.

**Zijat Mušić** postavio je pitanje u kojoj fazi je realizacija zaključaka koje su donijeli oba doma a odnose se na donošenje zakona o povoljnom penzionisanju pripadnika oružanih snaga. Pokrenuo je inicijativu da se ovaj zakon donese do kraja godine, te da će on predložiti ovaj zakon ukoliko Vlada Federacije BiH to ne uradi.

**Zoran Jovanović** postavio je dva pitanja i pokrenuo dvije inicijative.

Prvo pitanje postavio je Federalnom ministarstvu raseljenih osoba i izbjeglica a tiče se procentualnog omjera podijeljenih sredstava iz budžeta Federacije BiH namijenjenih za povratak izbjeglih i raseljenih osoba u Republiku Srpsku i Federaciju BiH.

Drugo pitanje upućeno je Federalnom ministarstvu energije, rudarstva i industrije a odnosi se na to da li je Uredba o izmjenama i dopunama Uredbe o korištenju obnovljivih izvora energije i kogeneracije dovela pojedine proizvođače električne energije u neravnopravan i nekonkurentski položaj, posebno u pogledu utvrđivanja otkupne cijene električne energije. Upitao je da li je ova uredba u skladu sa Zakonom o električnoj energiji.

Pokrenuo je inicijativu kojom je zatražio od Federalnog ministarstva prometa i komunikacija da se na magistralnoj cesti Tuzla-Bijeljina postave i znakovi za naseljena mjesta Kovačevo Selo i Požarac.

Također je pokrenuo i inicijativu da se ponovo postave znakovi na latinici i ćirilici koji označavaju naseljena mjesta na dionici puta od Mostara do graničnog prijelaza Doljani, te tako ukloni devastacija ovih znakova. Zatražio je da se po mogućnosti osiguraju videonadzori na pojedinim dionicama i da se počinioci ovih nedjela najstrožije kazne.

**Zahid Bašić** je pokrenuo inicijativu kojom traži od Federalnog ministarstva pravde, Vlade Federacije BiH i Visokog sudskog i tužilačkog vijeća Bosne i Hercegovine da ispoštuju obaveze vezane za uspostavu općinskih sudova u Banovićima i Lukavcu.

**Vesna Saradžić** izrazila je nezadovoljstvo dobijenim odgovorom na pitanje koje se tiče mogućnosti stipendiranja učenika u inozemstvu, te zatražila dopunu odgovora.

Postavila je pitanje koje se odnosi na zaštitu vlasnika privatnog zemljišta, kada se vrši otklanjanje rastinja radi normalnog korištenja elektroenergetskog objekta bez prethodne najave vlasniku.

**Esed Radeljaš** pokrenuo je inicijativu za izmjenu Zakona o advokaturi Federacije BiH kojom bi se predvidjelo da se advokatski ispit polaže pred komisijom koju imenuje Federalno ministarstvo pravde umjesto pred komisijom koju, prema važećem zakonu bira Advokatska komora Federacije BiH, te bi se ovim izmjenama izbjegle zloupotrebe.

**Almending Aliefendić** uputio je pitanje upravi JP Elektroprivreda BiH d.d. da li je Planom poslovanja u okviru stavke - kapitalne investicije, pripreme aktivnosti na izgradnji za 2012. godinu - predvidjela sredstva za sklapanje ugovora o prijateljskom okruženju sa lokalnim zajednicama i da li postoji plan raspodjele tih sredstava po općinama.

**Luka Faletar** postavio je pitanje Vladi Federacije - na osnovu kojih propisa je Vlada donijela Odluku o listi esencijalnih lijekova neophodnih za osiguranje zdravstvene zaštite u okviru standarda obaveznog zdravstvenog osiguranja u Federaciji BiH koja sadrži i cijene lijekova. Zatražio je da mu se odgovor dostavi u pisanoj formi.

**Josip Perić** postavio je dva delegatska pitanja i pokrenuo jednu inicijativu.

Prvo pitanje uputio je federalnom ministru za pitanje branitelja i invalida odbrambeno-oslobodilačkog rata – prema kojem kriteriju se određeno mjesto u toku rata gdje su bili zatvoreni, maltretirani i ubijani ljudi koji nisu pripadali određenoj etničkoj skupini naziva sabirnim centrom, a u drugom slučaju to isto mjesto naziva se logorom.

Drugo pitanje je postavio Vladi Federacije - koliko je na osnovu revizijskih izvještaja podneseno prijava uključujući i prijave na osnovu izvještaja za rad Vlade, te koliko uopće koštaju državu te revizije ako se ništa ne poduzima.

Pokrenuo je inicijativu kojom je zatražio od Vlade Federacije da zakonom zabrani svima koji su upravljali javnim poduzećima, javnim institucijama, budžetima i doveli ih do gubitaka, postavljenje na bilo koje rukovodeće mjesto.

**Radoje Vidović** zatražio je dopunu odgovora od Vlade Federacije, svih ministarstava u Vladi Federacije, ureda predsjednika i potpredsjednika Federacije i rukovodstva oba doma Parlamenta Federacije u vezi sa brojem novih zaposlenika primljenih u stalni radni odnos kao i broja osoba sa kojima je zaključen ugovor o djelu od 17.3.2011. godine, sa imenima i prezimenima i stručnom spremom.

Drugo pitanje je postavio Vladi Federacije - šta je poduzela u vezi sa provođenjem Odluke Ustavnog suda Federacije BiH a tiče se Zakona o Poreznoj upravi Federacije BiH.

**Enes Salkanović** zatražio je od Vlade Federacije da mu se dostave kriteriji na osnovu kojih je izvršena raspodjela sredstava (16 miliona KM) nerazvijenim kantonima u Federaciji BiH.

**Sretko Radišić** je postavio pitanje Federalnom ministarstvu rada i socijalne politike vezano uz član 143. Zakona o radu - koliko je na osnovu ovog člana pokrenuto zahtjeva za povratak na posao i koliko je od tih zahtjeva pozitivno a koliko negativno riješeno, tj. koliko je pozitivnih efekata donijela primjena ovog člana.

**Daliborka Milović** postavila je dva delegatska pitanja.

Prvo pitanje je uputila Vladi Federacije - u kojoj fazi je trenutno procedura izbora članova u Komisiju za koncesije Federacije BiH.

Drugo pitanje je uputila predsjedniku Federacije BiH u vezi sa procedurom imenovanja sudija Ustavnog suda Federacije BiH koja je započeta u prošlom mandatnom periodu a još nije završena.

**Drago Puzigaća** postavio je pitanje Kolegiju Doma naroda - kada će Prijedlog Zakona o šumama biti na dnevnom redu sjednice Doma naroda. Odgovor je zatražio u pisanoj formi.

**Ivo Divković** pokrenuo je inicijativu prema Vladi Federacije da svojim zaključkom obavežu privredna društva na koja polažu pravo upravljanja na osnovu kapitala, da po završnom računu za 2011. godinu izdvoje maksimalna moguća sredstva za stimulaciju privremenog penzionisanja radnika koji su ostvarili pravo na prijevremenu penziju, a da se ta radna mjesta oslobode za prijem nezaposlenih kadrova.

**Stipo Pelivan** postavio je dva delegatska pitanja.

Prvo pitanje postavio je Vladi Federacije, predsjedavajućoj Doma naroda i Stručnim službama ovog doma - kakve su odluke i zakoni koje donosi Dom naroda, s obzirom na privremeni nalog Visokog predstavnika kojim je privremeno suspendirana Odluka Centralne izborne komisije od 24.3.2011. godine tj. da li su ove odluke i zakoni privremeni, da li će se morati stavljati ponovo u proceduru usvajanja nakon što nalog Visokog predstavnika bude van snage, zatražio je odgovor u pisanoj formi.

Drugo pitanje je postavio Kolegiju Doma naroda - kada će Prijedlog Zakona o privrednim komorama biti na dnevnom redu sjednice Doma naroda.

**Mladen Lonić** postavio je pitanje Federalnom ministarstvu prometa i komunikacija i Direkciji za ceste Federacije BiH - da li je u planu i kada će biti asfaltiran magistralni put M14-2 Bosanska Krupa-Bosanski Petrovac.

Nakon postavljenih delegatskih pitanja i pokrenutih inicijativa prešlo se na utvrđivanje dnevnog reda.

Prije utvrđivanja dnevnog reda predsjedavajuća je odgovorila delegatu Esedu Radeljašu da će, u skladu sa članom 76. stav 9. Poslovnika o radu Domu naroda, Kolegij Doma naroda razmatrati inicijativu u vezi sa izmjenama i dopunama Zakona o advokaturi te će je dostaviti nadležnim radnim tijelima da se o njoj izjasne.

Predsjedavajuća je obavijestila delegate da je Klub delegata bošnjačkog naroda predložio da se u dnevni red sjednice kao 1. tačka uvrsti Prijedlog Zakona o izmjeni i dopuni Zakona o električnoj energiji koji je svojom odlukom progalsio Visoki predstavnik za Bosnu i Hercegovinu, što su delegati prihvatili.

Kolegij Doma naroda je predložio da se Prijedlog Krivičnog zakona Federacije BiH čiji je predlagač Jasmin Duvnjak, delegat u Predstavničkom domu, razmatra u formi nacрта Zakona.

Na osnovu rezultata glasanja, predsjedavajuća je konstatovala da je, sa 31 glasom za, uz 10 uzdržanih glasova i uz jedan glas protiv, Dom naroda Parlamenta Federacije prihvatio da se Prijedlog Krivičnog zakona Federacije BiH razmatra u formi nacрта Zakona.

Kolegij Doma naroda je, također, predložio da se Prijedlog Zakona o dopunama Zakona o javnim poduzećima razmatra u formi nacрта Zakona.

Na osnovu rezultata glasanja, predsjedavajuća je konstatovala da je, sa 31 glasom za i uz osam uzdržanih glasova, Dom naroda Parlamenta Federacije prihvatio da se Prijedlog Zakona o dopunama Zakona o javnim poduzećima razmatra u formi nacрта Zakona.

Kolegij Doma naroda je na prijedlog federalnog ministra zdravstva Rasmira Mesihovića predložio da se 10. tačka - Nacrt Zakona o liječništvu - skine sa dnevnog reda jer bi se ovaj zakon trebao razmatrati zajedno sa Nacrtom Zakona o sestrinstvu.

Na osnovu rezultata glasanja, predsjedavajuća je konstatovala da je,

sa 32 glasa za, uz dva uzdržana glasa i uz tri glasa protiv, Dom naroda Parlamenta Federacije prihvatio da se Nacrt Zakona o liječništvu skine sa dnevnog reda.

Predsjedavajuća Doma naroda je prije utvrđivanja dnevnog reda predložila da se Dom naroda izjasni o tehničkoj ispravci Zakona o Finansijsko-informatičkoj agenciji, koji je Predstavnički dom usvojio 28.9.2011. godine a Dom naroda 28.7.2011. godine.

Stručna služba Doma naroda je prilikom izrade Izvornika zakona uočila grešku u članu 16. Zakona, te je obavijestila Federalno ministarstvo finansija kao predlagača Zakona da Zakon na hrvatskom jeziku u članu 16. ima dva stava, dok u tekstovima na srpskom jeziku i bosanskom jeziku ima jedan stav. Federalno ministarstvo finansija dopisom od 4.10.2011. godine obavijestilo je Parlament Federacije BiH da je prilikom lektoriranja teksta Prijedloga Zakona u Federalnom ministarstvo finansija došlo do greške, te su zauzeli stav da je u članu 16. na bosanskom jeziku i srpskom jeziku potrebno dodati stav 2. kako glasi na hrvatskom jeziku.

Budući da je Predstavnički dom na 7. sjednici od 26.10.2011.godine usvojio prijedlog Federalnom ministarstvo finansija, potrebno je da i Dom naroda obavi ispravku.

Na osnovu rezultata glasanja, predsjedavajuća je konstatovala da je Dom naroda Parlamenta Federacije, sa 40 glasova za, uz osam uzdržanih glasova i uz jedan glas protiv, usvojio prijedlog Federalnog ministarstva finansija kojim je stav 2. dodan u član 16. Zakona na bosanskom jeziku i srpskom jeziku. Ovim su otklonjene smetnje za objavu ovog zakona u "Službenim novinama Federacije BiH".

Nakon toga predsjedavajuća je upitala da li ima prijedloga za izmjenu dnevnog reda.

Predsjednik Kluba delegata hrvatskog naroda Radoje Vidović je, ispred Kluba, predložio da se 9. tačka - Nacrt Zakona o upravljanju državnim kapitalom u privrednim društvima u Federaciji BiH - skine sa predloženog dnevnog reda.

Drago Puzigaća je, ispred Odbora za denacionalizaciju i privatizaciju Doma naroda, također predložio da se sa dnevnog reda skine 9. tačka. Odbor je predložio se se Nacrt Zakona o javnim preduzećima prihvati kao dobra osnova za izradu prijedloga Zakona.

U raspravi oko prijedloga za skidanje sa dnevnog reda tačke - Nacrt Zakona o upravljanju državnim kapitalom u privrednim društvima u Federaciji BiH - učestvovali su: Jasenko Tufekčić koji je izjavio da bi federalni ministar energije, rudarstva i industrije Erdal Trhulj trebao obrazložiti nacrt ovog zakona i predsjednik Odbora za privredu Hajrudin Bećirovići Erdal Trhulj.

Nakon toga predsjedavajuća je dala na glasanje prijedlog Kluba delegata hrvatskog naroda i Odbora za denacionalizaciju i privatizaciju da se 9. tačka - Nacrt Zakona o upravljanju državnim kapitalom u privrednim društvima u Federaciji BiH - skine sa predloženog dnevnog reda.

Na osnovu rezultata glasanja, konstatovano je da Dom naroda Parlamenta Federacije BiH nije prihvatio prijedlog da se Nacrt Zakona o upravljanju državnim kapitalom u privrednim društvima u Federaciji BiH skine sa predloženog dnevnog reda jer je za glasalo 16 delegata, devet delegata je bilo uzdržano a 23 delegata su bila protiv.

Nakon toga se glasalo o predloženom dnevnom redu.

Sa 32 glasa za, uz osam glasova protiv i uz pet uzdržanih glasova, Dom naroda Parlamenta Federacije usvojio je sljedeći:

## **D N E V N I R E D**

1. Prijedlog Zakona o izmjenama i dopunama Zakona o električnoj energiji (predlagač: Klub delegata bošnjačkog naroda u Domu naroda) (potvrđivanje Zakona koji je proglasio Visoki predstavnik za Bosnu i Hercegovinu),
2. Prijedlog Zakona o dopuni Zakona o utvrđivanju naseljenih mjesta i o izmjenama u nazivima naseljenih mjesta u određenim općinama,
3. Nacrt Zakona o dopunama Krivičnog zakona Federacije BiH (predlagač: Jasmin Duvnjak, zastupnik u Predstavničkom domu),
4. Nacrt Zakona o dopunama Zakona o javnim preduzećima,
5. Nacrt Zakona o utvrđivanju i načinu izmirenja neizmirenih obaveza nastalih na osnovu Zakona o osnovama socijalne zaštite, zaštite civilnih žrtava rata i zaštite porodice sa djecom,
6. Nacrt Zakona o električnoj energiji u Federaciji BiH,
7. Nacrt Zakona o finansiranju poslova premjera i uspostavljanja katastra nekretnina,
8. Nacrt Zakona o vinu,
9. Nacrt Zakona o izmjenama i dopunama Zakona o agencijama i unutrašnjim službama za zaštitu ljudi i imovine,
10. Nacrt Zakona o upravljanju državnim kapitalom u privrednim društvima u Federaciji BiH,
11. Nacrt Prostornog plana područja posebnih obilježja od značaja za Federaciju BiH „Autocesta na Koridoru Vc“,
12. Odluka o izmjeni Odluke o osnivanju i imenovanju članova Vijeća nacionalnih manjina Federacije BiH (predlagač: Administrativna komisija Predstavničkog doma),
13. a) Prijedlog Odluke o prihvatanju zaduženja po Sporazumu o zajmu između Bosne i Hercegovine i OPEC Fonda za međunarodni razvoj za realizaciju Projekta unapređenja uvjeta života na selu,  
b) Nacrt - Projekt unapređenja uvjeta života na selu Sporazum o zajmu između Bosne i Hercegovine i OPEC Fonda za međunarodni razvoj,  
c) Informacija o zajmu OPEC Fonda za međunarodni razvoj(OFID) za Projekt poboljšanja životnih uvjeta na selu,

14. a) Prijedlog Odluke o prihvatanju zaduženja po Sporazumu o zajmu između Bosne i Hercegovine i OPEC Fonda za međunarodni razvoj za realizaciju Projekta stambene obnove,  
 b) Nacrt - Projekt stambene obnove Sporazum o zajmu između Bosne i Hercegovine i OPEC Fonda za međunarodni razvoj,  
 c) Informacija o zajmu OPEC Fonda za međunarodni razvoj(OFID) za Projekt stambene obnove,
15. a) Prijedlog Odluke o prihvatanju zaduženja po Sporazumu o kreditu između Bosne i Hercegovine i Unicredit Bank Austria AG za finansiranje Projekta nabavke, instalacije, obuke i održavanja medicinske i nemedicinske opreme i usluga u Kantonalnoj bolnici Orašje,  
 b) Sporazum o kreditiranju između Bosne i Hercegovine koju predstavlja Ministarstvo finansija i trezora i Unicredit Bank Austria AG,  
 c) Informacija o robnom kreditu Unicredit Bank Austria AG za finansiranje Projekta nabavke, instalacije, obuke i održavanja medicinske i nemedicinske opreme i usluga u Kantonalnoj bolnici Orašje,
16. Izvještaj o izvršenju Finansijskog plana Federalnog fonda solidarnosti za 2010.godinu,
17. Usaglašavanje Prijedloga Zakona o izmjenama i dopunama Zakona o klasifikaciji djelatnosti u Federaciji BiH,
18. Izbor i imenovanja.

**1. Prijedlog Zakona o izmjenama i dopunama Zakona o električnoj energiji** (predlagač: Klub delegata bošnjačkog naroda u Domu naroda) (potvrđivanje Zakona koji je proglasio Visoki predstavnik za Bosnu i Hercegovinu)

Predsjedavajuća je podsjetila delegate da se radi o zakonu koji je svojom odlukom proglasio Visoki predstavnik za Bosnu i Hercegovinu. Također je izjavila da se ovaj zakon mora usvojiti u istovjetnom tekstu kako ga je proglasio Visoki predstavnik.

Prijedlog Zakona obrazložio je Amir Zukić, predsjednik Kluba delegata bošnjačkog naroda.

U raspravi nije niko učestvovao.

Na osnovu rezultata glasanja, predsjedavajuća je konstatovala da je Dom naroda Parlamenta Federacije, sa 36 glasova za, uz pet glasova protiv i uz pet uzdržanih glasova, usvojio Prijedlog Zakona o izmjenama i dopunama Zakona o električnoj energiji.

Time je ovaj zakon usvojen u istovjetnom tekstu kako ga je proglasio Visoki predstavnik.



## **2. Prijedlog Zakona o dopuni Zakona o utvrđivanju naseljenih mjesta i o izmjenama u nazivima naseljenih mjesta u određenim općinama**

Prijedlog Zakona utvrdila je Vlada Federacije.

Predstavnički dom je na 7. sjednici od 26.10.2011. godine usvojio Prijedlog Zakona u tekstu kako ga je predložila Vlada Federacije.

Prijedlog Zakona razmatrala su nadležna radna tijela i dostavila izvještaje.

Prijedlog Zakona obrazložio je Anto Čavar, predstavnik federalnog ministarstva pravde.

U raspravi nije niko učestvovao.

Na osnovu rezultata glasanja, predsjedavajuća je konstatovala da je Dom naroda Parlamenta Federacije, sa 45 glasa za, uz jedan glas protiv i uz četiri uzdržana glasa, usvojio Prijedlog Zakona o dopuni Zakona o utvrđivanju naseljenih mjesta i o izmjenama u nazivima naseljenih mjesta u određenim općinama.

## **3. Nacrt Zakona o dopunama Krivičnog zakona Federacije BiH** (predlagač: Jasmin Duvnjak, zastupnik u Predstavničkom domu)

Predstavnički dom je na 6. sjednici od 28.9.2011. godine razmatrao Zakon u formi nacrtu i Zaključkom ga prihvatio.

Zakon je dostavljen Vladi Federacije na mišljenje.

Zakon su u formi prijedloga razmatrala nadležna radna tijela i dostavila izvještaje.

Nacrt Zakona obrazložio je Jasmin Duvnjak, zastupnik u Predstavničkom domu.

Jasenko Tufekčić, predsjednik Zakonodavno-pravne komisije, obrazložio je stav Komisije.

U raspravi su učestvovali: Predrag Kojović, Elvira Abdić-Jelenović, Jasenko Tufekčić, Ivo Tadić, Damir Čardžić, Ekrem Prošić i Jasmin Duvnjak.

Na osnovu rezultata glasanja, predsjedavajuća je konstatovala da je Dom naroda Parlamenta Federacije, sa 37 glasova za, uz četiri glasa protiv i uz devet uzdržanih glasova, usvojio sljedeći:

### **ZAKLJUČAK**

1. Dom naroda Parlamenta Federacije BiH prihvata Nacrt Zakona o dopunama Krivičnog zakona Federacije BiH i smatra da može poslužiti kao osnova za izradu prijedloga Zakona.
2. Zadužuje se predlagač da zajedno sa resornim ministarstvom prilikom izrade prijedloga Zakona ima u vidu primjedbe, prijedloge i sugestije iznesene na sjednici, te da u roku od 45 dana pripremi i u parlamentarnu proceduru uputi prijedlog Zakona.

#### **4. Nacrt Zakona o dopunama Zakona o javnim preduzećima**

Zakon je u formi prijedloga utvrdila Vlada Federacije.

Predstavnički dom je na 6. sjednici od 28.9.2011. godine razmatrao Zakon u formi nacrtu i Zaključkom ga prihvatio.

Zakon su u formi prijedloga razmatrala nadležna radna tijela i dostavila izvještaje.

Nacrt Zakona obrazložio je Erdal Trhulj, federalni ministar energije, rudarstva i industrije.

Hajrudin Bećirović je obrazložio stav Odbora za privredu.

Na osnovu rezultata glasanja, predsjedavajuća Doma naroda je konstatovala da je Dom naroda Parlamenta Federacije BiH, sa 34 glasa za, uz pet glasova protiv i uz osam uzdržanih glasova, usvojio sljedeći:

#### **ZAKLJUČAK**

1. Dom naroda Parlamenta Federacije BiH prihvata Nacrt Zakona o dopunama Zakona o javnim poduzećima i smatra da može poslužiti kao osnova za izradu prijedloga Zakona.
2. Zadužuje se Vlada Federacije da prilikom izrade prijedloga Zakona ima u vidu primjedbe, prijedloge i sugestije iznesene na sjednici, te da u roku od 45 dana pripremi i u parlamentarnu proceduru uputi prijedlog Zakona.

#### **5. Nacrt Zakona o utvrđivanju i načinu izmirenja neizmirenih obaveza nastalih na osnovu Zakona o osnovama socijalne zaštite, zaštite civilnih žrtava rata i zaštite porodice sa djecom**

Nacrt Zakona utvrdila je Vlada Federacije.

Predstavnički dom je na 6. sjednici od 28.9.2011. godine razmatrao Nacrt Zakona i Zaključkom ga prihvatio.

Nacrt Zakona razmatrala su nadležna radna tijela i dostavila izvještaje.

Nacrt Zakona obrazložio je Dobrica Jonjić, pomoćnik federalnog ministra rada i socijalne politike.

U raspravi su učestvovali: predsjednica Kluba delegata srpskog naroda Mira Ljubijankić, Elvira Abdić-Jelenović i Dobrica Jonjić.

Elvira Abdić Jelenović je zatražila da se konstatuje koliko je delegata u tom trenutku bilo u sali jer bi Dom naroda morao imati kvorum i prilikom rasprave o svakoj tački dnevnog reda, a ne samo prilikom glasanja.

Sa 37 glasova za, uz tri glasa protiv i uz devet uzdržanih glasova, Dom naroda Parlamenta Federacije BiH usvojio je sljedeći:

## **ZAKLJUČAK**

1. Dom naroda Parlamenta Federacije BiH prihvaća Nacrt Zakona o utvrđivanju i načinu izmirenja neizmirenih obaveza nastalih na osnovu Zakona o osnovama socijalne zaštite, zaštite civilnih žrtava rata i zaštite porodice sa djecom i smatra da može poslužiti kao osnova za izradu prijedloga Zakona.
2. Zadužuje se Vlada Federacije da prilikom izrade prijedloga Zakona ima u vidu primjedbe, prijedloge i sugestije iznesene na sjednici, te da u roku od 30 dana pripremi i u parlamentarnu proceduru uputi prijedlog Zakona.

### **6. Nacrt Zakona o električnoj energiji u Federaciji BiH**

Nacrt Zakona utvrdila je Vlada Federacije.

Predstavnički dom je na 7. sjednici od 26.10.2011. godine razmatrao Nacrt Zakona i Zaključkom ga prihvatio. Tom prilikom Predstavnički dom je ovaj nacrt Zakona stavio na javnu raspravu.

Nacrt Zakona razmatrala su nadležna radna tijela i dostavila izvještaje.

Nacrt Zakona obrazložio je Erdal Trhulj, federalni ministar energije, rudarstva i industrije.

Ivo Divković je obrazložio stav Odbora za privredu.

U raspravi su učestvovali: Ivo Divković, Senahid Šaković, Zahid Bašić, Mladen Lonić, Sretko Radišić i Hajrudin Bećirović.

Sa 38 glasova za, uz šest glasa protiv i uz šest uzdržanih glasova, Dom naroda Parlamenta Federacije BiH usvojio je sljedeći:

## **ZAKLJUČAK**

1. Dom naroda Parlamenta Federacije BiH prihvaća Nacrt Zakona o električnoj energiji u Federaciji BiH i smatra da može poslužiti kao osnova za izradu prijedloga Zakona.
2. Zadužuje se Vlada Federacije da u roku od 30 dana organizira javnu raspravu i da prilikom izrade prijedloga Zakona ima u vidu primjedbe, prijedloge i sugestije iznesene na sjednici, kao i one iznesene u javnoj raspravi.

## **7. Nacrt Zakona o finansiranju poslova premjera i uspostavljanja katastra nekretnina**

Nacrt Zakona utvrdila je Vlada Federacije.

Predstavnički dom je na 7. sjednici od 26.10.2011. godine razmatrao Nacrt Zakona i Zaključkom ga prihvatio. Tom prilikom je Predstavnički dom Nacrt Zakona stavio na javnu raspravu.

Nacrt Zakona razmatrala su nadležna radna tijela i dostavila izvještaje.

Nacrt Zakona obrazložio je Željko Obradović, direktor Federalne uprave za geodetske i imovinsko-pravne poslove.

U raspravi su učestvovali: Zahid Bašić, ispred Kluba delegata bošnjačkog naroda, Radoje Vidović, predsjednik Kluba delegata hrvatskog naroda, Željko Obradović i Amir Zukić, predsjednik Kluba delegata bošnjačkog naroda.

Sa 31 glasom za, uz sedam glasova protiv i uz 12 uzdržanih glasova, Dom naroda Parlamenta Federacije BiH usvojio je sljedeći:

### **ZAKLJUČAK**

1. Dom naroda Parlamenta Federacije BiH prihvaća Nacrt Zakona o finansiranju poslova premjera i uspostavljanja katastra nekretnina i smatra da može poslužiti kao osnova za izradu prijedloga Zakona.
2. Zadužuje se Vlada Federacije da u roku od 30 dana organizira javnu raspravu.
3. Zadužuje se Vlada Federacije da prilikom izrade prijedloga Zakona ima u vidu primjedbe, prijedloge i sugestije iznesene na sjednici, kao i one iznesene u javnoj raspravi.

## **8. Nacrt Zakona o vinu**

Nacrt Zakona utvrdila je Vlada Federacije.

Predstavnički dom je na 7. sjednici od 26.10.2011. godine razmatrao Nacrt Zakona i Zaključkom ga prihvatio.

Nacrt Zakona razmatrala su nadležna radna tijela i dostavila izvještaje.

Nacrt Zakona obrazložila je Faketa Begović, pomoćnica federalnog ministra poljoprivrede, vodoprivrede i šumarstva.

Slobodan Tomić je obrazložio stav Odbora za poljoprivredu, vodoprivredu i šumarstvo.

U raspravi su učestvovali: Amir Zukić, predsjednik Kluba delegata bošnjačkog naroda, Radoje Vidović, predsjednik Kluba delegata hrvatskog naroda, Mira Ljubijankić, predsjednica Kluba delegata srpskog naroda, i Slobodan Tomić.

Sa 40 glasova za, uz pet glasova protiv i uz pet uzdržanih glasova, Dom naroda Parlamenta Federacije BiH usvojio je sljedeći:

## ZAKLJUČAK

1. Dom naroda Parlamenta Federacije BiH prihvaća Nacrt Zakona o vinu i smatra da može poslužiti kao osnova za izradu prijedloga Zakona.
2. Zadužuje se Vlada Federacije da prilikom izrade prijedloga Zakona ima u vidu primjedbe, prijedloge i sugestije iznesene na sjednici.

### **9. Nacrt Zakona o izmjenama i dopunama Zakona o agencijama i unutrašnjim službama za zaštitu ljudi i imovine**

Nacrt Zakona utvrdila je Vlada Federacije.

Predstavnički dom je na 7. sjednici od 26.10.2011. godine razmatrao Nacrt Zakona i Zaključkom ga prihvatio. Tom prilikom je Predstavnički dom Nacrt Zakona stavio na javnu raspravu.

Nacrt Zakona razmatrala su nadležna radna tijela i dostavila izvještaje.

Nacrt Zakona obrazložio je Predrag Kurteš, federalni ministar unutrašnjih poslova.

U raspravi su učestvovali: Esad Bašagić, Radoje Vidović, predsjednik Kluba delegata hrvatskog naroda, Jasmin Smailbegović i Hanka Vajzović.

Sa 36 glasova za, uz pet glasova protiv i uz osam uzdržanih glasova, Dom naroda Parlamenta Federacije BiH usvojio je sljedeći:

## ZAKLJUČAK

1. Dom naroda Parlamenta Federacije BiH prihvaća Nacrt Zakona o izmjenama i dopunama Zakona o agencijama i unutrašnjim službama za zaštitu ljudi i imovine i smatra da može poslužiti kao osnova za izradu prijedloga Zakona.
2. Zadužuje se Vlada Federacije da u roku od 30 dana organizira javnu raspravu.
3. Zadužuje se Vlada Federacije da prilikom izrade prijedloga Zakona ima u vidu primjedbe, prijedloge i sugestije iznesene na sjednici, kao i one iznesene u javnoj raspravi.

### **10. Nacrt Zakona o upravljanju državnim kapitalom u privrednim društvima u Federaciji BiH**

Nacrt Zakona utvrdila je Vlada Federacije.

Predstavnički dom je na nastavku 7. sjednice od 27.10.2011. godine razmatrao Nacrt Zakona i Zaključkom ga prihvatio. Tom prilikom je Predstavnički dom ovaj nacrt Zakona stavio na javnu raspravu.

Nacrt Zakona razmatrala su nadležna radna tijela i dostavila izvještaje.

Nacrt Zakona obrazložio je Erdal Trhulj, federalni ministar energije, rudarstva i industrije.

Jasenko Tufekčić, predsjednik Zakonodavno-pravne komisije je obrazložio stav Komisije.

U raspravi su učestvovali: Ivo Divković, Elvira Abdić-Jelenović, Sretko Radišić, Radoje Vidović, predsjednik Kluba delegata hrvatskog naroda, Hajrudin Bećirović, Damir Čardžić, Adnan Jupić, Dževad Rađo, Jasenko Tufekčić i ministar Erdal Trhulj.

Sa 33 glasa za, uz devet glasova protiv i uz četiri uzdržana glasa, Dom naroda Parlamenta Federacije BiH usvojio je sljedeći:

### **ZAKLJUČAK**

1. Dom naroda Parlamenta Federacije BiH prihvaća Nacrt Zakona o upravljanju državnim kapitalom u privrednim društvima u Federaciji BiH i smatra da može poslužiti kao osnov za izradu prijedloga Zakona.
2. Zadužuje se Vlada Federacije da u roku od 45 dana organizira javnu raspravu.
3. Zadužuje se Vlada Federacije da prilikom izrade prijedloga Zakona ima u vidu primjedbe, prijedloge i sugestije iznesene na sjednici, kao i one iznesene u javnoj raspravi.

#### **11. Nacrt Prostornog plana područja posebnih obilježja od značaja za Federaciju BiH „Autocesta na Koridoru Vc“**

Nacrt Plana utvrdila je Vlada Federacije.

Vlada Federacije je naknadno dostavila amandman na Nacrt Plana.

Predstavnički dom je na nastavku 7. sjednice od 27.10.2011. godine razmatrao Nacrt Plana i Zaključkom ga prihvatio. Tom prilikom je Predstavnički dom ovaj nacrt Plana stavio na javnu raspravu.

Nacrt Plana razmatrala su nadležna radna tijela i dostavila izvještaje.

Nacrt Plana obrazložili su Desnica Radivojević, federalni ministar prostornog uređenja, i Ešref Gačanin.

U raspravi nije niko učestvovao.

Sa 41 glasom za, uz tri glasa protiv i uz pet uzdržanih glasova, Dom naroda Parlamenta Federacije BiH usvojio je sljedeći:

### **ZAKLJUČAK**

1. Dom naroda Parlamenta Federacije BiH prihvaća Nacrt Prostornog plana područja posebnih obilježja od značaja za Federaciju BiH „Autocesta na Koridoru Vc“ i smatra da može poslužiti kao osnov za izradu prijedloga Prostornog plana.
2. Zadužuje se Vlada Federacije da u roku od 30 dana organizira javnu raspravu.

3. Zadužuje se Vlada Federacije da prilikom izrade prijedloga Prostornog plana ima u vidu primjedbe, prijedloge i sugestije iznesene na sjednici, kao i one iznesene u javnoj raspravi.

## **12. Odluka o izmjeni Odluke o osnivanju i imenovanju članova Vijeća nacionalnih manjina Federacije BiH**

Predlagač ove odluke je Administrativna komisija Predstavničkog doma.

Predstavnički dom je na nastavku 7. sjednice od 27.10.2011. godine donio Odluku o izmjeni Odluke o osnivanju i imenovanju članova Vijeća nacionalnih manjina Federacije BiH u tekstu kako ju je predložio predlagač.

Odluku su razmatrala nadležna radna tijela i dostavila izvještaje.

Odluku je obrazložio Ramiz Zahirović, predsjednik Administrativne komisije Predstavničkog doma, koji je dao pravno-tehničku primjedbu da se u tački I. iza broja „79/09“ doda broj „52/11“.

Mirko Batinić je obrazložio stav Komisije za ljudska prava i slobode.

U raspravi nije niko učestvovao.

Sa 43 glasa za, uz jedan glas protiv i uz sedam uzdržanih glasova, Dom naroda Parlamenta Federacije BiH donio je Odluku o izmjeni Odluke o osnivanju i imenovanju članova Vijeća nacionalnih manjina Federacije BiH sa pravno-tehničkom primjedbom da se u tački I. iza broja „79/09“ doda broj „52/11“.

Predsjedavajuća je predložila da se o tač. 13., 14. i 15. objedini rasprava a glasanje obavi pojedinačno, što su delegati prihvatili.

13. a) **Prijedlog Odluke o prihvatanju zaduženja po Sporazumu o zajmu između Bosne i Hercegovine i OPEC Fonda za međunarodni razvoj za realizaciju Projekta unapređenja uvjeta života na selu**
- b) **Nacrt - Projekt unapređenja uvjeta života na selu Sporazum o zajmu između Bosne i Hercegovine i OPEC Fonda za međunarodni razvoj**
- c) **Informacija o zajmu OPEC Fonda za međunarodni razvoj (OFID) za Projekt poboljšanja životnih uvjeta na selu**
14. a) **Prijedlog Odluke o prihvatanju zaduženja po Sporazumu o zajmu između Bosne i Hercegovine i OPEC Fonda za međunarodni razvoj za realizaciju Projekta stambene obnove**
- b) **Nacrt - Projekt stambene obnove Sporazum o zajmu između Bosne i Hercegovine i OPEC Fonda za međunarodni razvoj**
- c) **Informacija o zajmu OPEC Fonda za međunarodni razvoj (OFID) za Projekt stambene obnove**

15. a) **Prijedlog Odluke o prihvatanju zaduženja po Sporazumu o kreditu između Bosne i Hercegovine i Unicredit Bank Austria AG za finansiranje Projekta nabavke, instalacije, obuke i održavanja medicinske i nemedicinske opreme i usluga u Kantonalnoj bolnici Orašje**

b) **Sporazum o kreditiranju između Bosne i Hercegovine koju predstavlja Ministarstvo finansija i trezora i Unicredit Bank Austria AG**

c) **Informacija o robnom kreditu Unicredit Bank Austria AG za finansiranje Projekta nabavke, instalacije, obuke i održavanja medicinske i nemedicinske opreme i usluga u Kantonalnoj bolnici Orašje**

Odluke je utvrdila Vlada Federacije i dostavila Parlamentu Federacije radi razmatranja i donošenja.

Predstavnički dom je na 7. sjednici, odžanoj 26. i 27.10.2011. godine, donio ovu odluku u tekstu predlagača.

Uz odluke su dostavljeni sporazumi i informacije kao prateći materijali.

Prijedloge odluka razmatrala su nadležna radna tijela i dostavila izvještaje.

Odluke je obrazložio Ante Krajina, federalni ministar finansija.

U raspravi su učestvovali Zahid Bašić, Elvira Abdić-Jelenović i Ante Krajina.

Elvira Abdić-Jelenović predložila je da Dom naroda donese zaključak koji se odnosi na dostavu Projekta stambene obnove na osnovu koje je prihvaćeno zaduženje Vlade Federacije po Sporazumu o zajmu između Bosne i Hercegovine i OPEC Fonda za međunarodni razvoj i dostavu spiska 700 stambenih jedinica na koje se Projekt odnosi.

Na osnovu rezultata glasanja, predsjedavajuća je konstatovala da Dom naroda Parlamenta Federacije nije usvojio predloženi zaključak jer je za glasalo 23 delegata, 12 delegata je bilo protiv, a 11 delegata je bilo uzdržano.

Nakon rasprave, prešlo se na izjašnjavanje o ovim odlukama.

Na osnovu rezultata glasanja, predsjedavajuća je konstatovala da je Dom naroda Parlamenta Federacije (36 glasova za, četiri glasa protiv i četiri uzdržana glasa) donio **Odluku o prihvatanju zaduženja po Sporazumu o zajmu između Bosne i Hercegovine i OPEC Fonda za međunarodni razvoj za realizaciju Projekta unapređenja uvjeta života na selu.**

Na osnovu rezultata glasanja, predsjedavajuća je konstatovala da je Dom naroda Parlamenta Federacije (38 glasova za, pet glasova protiv i pet uzdržanih glasova) donio **Odluku o prihvatanju zaduženja po Sporazumu o zajmu između Bosne i Hercegovine i OPEC Fonda za međunarodni razvoj za realizaciju Projekta stambene obnove.**

Na osnovu rezultata glasanja, predsjedavajuća je konstatovala da je Dom naroda Parlamenta Federacije (41 glas za, jedan glas protiv i dva



uzdržana glasa) donio **Odluku o prihvatanju zaduženja po Sporazumu o kreditu između Bosne i Hercegovine i Unicredit Bank Austria AG za finansiranje Projekta nabavke, instalacije, obuke i održavanja medicinske i nemedicinske opreme i usluga u Kantonalnoj bolnici Orašje.**

#### **16. Izvještaj o izvršenju Finansijskog plana Federalnog fonda solidarnosti za 2010. godinu**

Izvještaj o izvršenju Finansijskog plana Federalnog fonda solidarnosti za 2010. godinu Vlada Federacije je prihvatila i dostavila Parlamentu Federacije radi usvajanja.

Predstavnički dom je na 6. sjednici, održanoj 28.9.2011. godine, prihvatio Izvještaj o izvršenju Finansijskog plana Federalnog fonda solidarnosti za 2010. godinu.

Izvještaj su razmatrala nadležna radna tijela i dostavila izvještaje.

U raspravi nije niko učestvovao.

Na osnovu rezultata glasanja, predsjedavajuća je konstatovala da je Dom naroda Parlamenta Federacije BiH, sa 39 glasova za, uz četiri glasa protiv i uz šest uzdržanih glasova, usvojio Izvještaj o izvršenju Finansijskog plana Federalnog fonda solidarnosti za 2010. godinu.

#### **17. Usaglašavanje Prijedloga Zakona o izmjenama i dopunama Zakona o klasifikaciji djelatnosti u Federaciji BiH**

Predsjedavajuća je podsjetila delegate da je Dom naroda Parlamenta Federacije na 5. sjednici, održanoj 15.9.2011. godine usvojio Prijedlog Zakona u tekstu kako ga je predložila Vlada Federacije.

Predstavnički dom je na 6. sjednici od 28.9.2011. godine usvojio Zakon uz amandman koji je naknadno podnijela Vlada Federacije, a koji glasi:

„U članu 8. riječi: „dužni su“ zamjenjuju se riječima: „po službenoj dužnosti“.“

U raspravi nije niko učestvovao.

Sa 37 glasova za, uz pet glasova protiv i uz pet uzdržanih glasova, Dom naroda Parlamenta Federacije BiH usvojio je amandman na član 8. Prijedloga Zakona o izmjenama i dopunama Zakona o klasifikaciji djelatnosti u Federaciji BiH čime je Zakon o izmjenama i dopunama Zakona o klasifikaciji djelatnosti u Federaciji BiH usvojen u istovjetnom tekstu u oba doma Parlamenta Federacije BiH.

## **18. Izbor i imenovanja**

### **a) Prijedlog Odluke o imenovanju Nezavisnog odbora**

Na osnovu člana 34. stav 2. Zakona o unutrašnjim poslovima Federacije BiH, Parlament Federacije BiH imenuje članove Nezavisnog odbora.

Prijedlog Odluke utvrdile su komisije za izbor i imenovanja oba doma Parlamenta Federacije BiH.

Predstavnički dom je na nastavku 7. sjednice od 27.10.2011. godine donio Odluku kojom su u Nezavisni odbor imenovani: Bože Bagarić, Enver Ćosićkić, Siniša Obradović, Nezir Pivić, Sead Selman, Branka Šekarić i Zoran Zekić.

Luka Faletar, član Komisije za izbor i imenovanja i član radne grupe koja je učestvovala u izboru članova Nezavisnog odbora, izjavio je da nije glasao za ovakav prijedlog jer je kandidat koji je imao veći broj bodova skinut sa liste a umjesto njega je predložen drugi kandidat, te upitao zašto je naknadno došlo do promjene već utvrđene liste kandidata.

Daliborka Milović, predsjednica Komisije za izbor i imenovanja, izjavila je da je Komisija za izbor i imenovanja Doma naroda upoznata sa prijedlogom radne grupe i da je Komisija za izbor i imenovanja Predstavničkog doma izvršila izmjenu jednog člana, tj. predsjednik radne grupe Safet Kešo je izvršio naknadne konsultacije sa članovima radne grupe koji su, sa pet glasova za i uz jedan glas protiv, predložili Boža Bagarića za člana Nezavisnog odbora umjesto Zlatka Brkića. Izjavila je da je Luka Faletar bio protiv ovog prijedloga. Također je izjavila da je Komisija za izbor i imenovanja Doma naroda, sa četiri glasa za i uz jedan glas protiv, predložila kandidate kako su izglasani u Predstavničkom domu.

Radoje Vidović, predsjednik Kluba delegata hrvatskog naroda je upitao zbog čega se promijenila lista predloženih kandidata.

Sa 31 glasom za, uz osam glasova protiv i uz šest uzdržanih glasova, Dom naroda Parlamenta Federacije donio je Odluku kojom su za članove Nezavisnog odbora imenovani: Bože Bagarić, Enver Ćosićkić, Siniša Obradović, Nezir Pivić, Sead Selman, Branka Šekarić i Zoran Zekić.

Budući da je Radoje Vidović izrazio sumnju u rezultate glasanja pristupilo se poimeničnom glasanju koje je obavio Izmir Hadžavić, sekretar Doma naroda.

Sa 31 glasom za, uz 14 glasova protiv i uz šest uzdržanih glasova, Dom naroda Parlamenta Federacije donio je Odluku kojom su za članove Nezavisnog odbora imenovani: Bože Bagarić, Enver Ćosićkić, Siniša Obradović, Nezir Pivić, Sead Selman, Branka Šekarić i Zoran Zekić.

## **b) Odluka o imenovanju jednog člana Nadzornog odbora Agencije za privatizaciju u Federaciji BiH**

Na osnovu člana 13. stav 2. Zakona o Agenciji za privatizaciju, Parlament Federacije donosi Odluku o imenovanju predsjednika i članova Nadzornog odbora Agencije za privatizaciju u Federaciji BiH.

Prijedlog Odluke utvrdile su komisije za izbor i imenovanja oba doma Parlamenta Federacije BiH.

Predstavnički dom je na 6. sjednici od 28.9.2011. godine donio Odluku o imenovanju Nedima Čustovića za člana Nadzornog odbora Agencije za privatizaciju u Federaciji BiH.

U raspravi niko nije učestvovao.

Sa 32 glasa za, uz četiri glasa protiv i uz pet uzdržanih glasova, Dom naroda Parlamenta Federacije donio je Odluku o imenovanju Nedima Čustovića za člana Nadzornog odbora Agencije za privatizaciju u Federaciji BiH.

## **c) Izbor zamjenika predsjednika Parlamentarne komisije odgovorne za reviziju**

Parlament Federacije je na sjednici Predstavničkog doma, održanoj 6.9.2011. godine, i na sjednici Doma naroda, održanoj 22.9.2011. godine, donio Odluku o izboru članova u Parlamentarnu komisiju odgovornu za reviziju. Za predsjednika komisije izabran je Mirsad Zaimović, zastupnik u Predstavničkom domu.

U skladu sa Odlukom o formiranju Parlamentarne komisije odgovorne za reviziju, predsjednik i zamjenik predsjednika ne mogu biti iz reda istog konstitutivnog naroda, pa zamjenik predsjednika treba biti iz reda srpskih ili hrvatskih delegata u Domu naroda.

Daliborka Milović je izjavila da je Komisija za izbor i imenovanja dobila dva prijedloga za zamjenika predsjednika Komisije. Klub delegata srpskog naroda je predložio Slađana Ilića a Klub delegata hrvatskog naroda Luku Faletara. Budući da Komisija nije postigla usaglašeni stav, Komisija predlaže da se Dom naroda izjasni o ovim prijedlozima.

Nakon toga se glasalo o ova dva prijedloga.

Na osnovu rezultata glasanja, predsjedavajuća je konstatovala da prijedlog Kluba delegata hrvatskog naroda da se **Luka Faletar** izabere za zamjenika predsjednika Komisije nije dobio potrebnu većinu glasova, jer je za glasalo 25 delegata, 17 delegata je bilo uzdržano, a osam delegata je bilo protiv.

Na osnovu rezultata glasanja, predsjedavajuća je konstatovala da je Dom naroda Parlamenta Federacije, sa 30 glasova za, uz 11 uzdržanih glasova i uz devet glasova protiv, donio Odluku kojom je **Sladjan Ilić** izabran za zamjenika predsjednika Parlamentarne komisije odgovorne za reviziju.

**d) Prijedlog Odluke o izmjeni Odluke o izboru članova u Parlamentarnu komisiju odgovornu za reviziju**

Prijedlog Odluke utvrdila je Komisija za izbor i imenovanja.

Daliborka Milović je obrazložila Izvještaj Komisije za izbor i imenovanja, koja je prihvatila prijedlog Kluba delegata srpskog naroda da se umjesto Mire Ljubijankić u Parlamentarnu komisiju odgovornu za reviziju izabere Zoran Jovanović.

U raspravi nije niko učestvovao.

Na osnovu rezultata glasanja, predsjedavajuća je konstatovala da je Dom naroda Parlamenta Federacije, sa 34 glasa za, uz dva uzdržana glasa i uz pet glasova protiv, donio Odluku o izmjeni Odluke o izboru članova u Parlamentarnu komisiju odgovornu za reviziju kojom je za člana Komisije izabran **Zoran Jovanović** umjesto Mire Ljubijankić.

**e) Prijedlog Odluke o izmjenama Odluke o izboru predsjednika, zamjenika predsjednika i članova radnih tijela Doma naroda Parlamenta Federacije BiH**

Prijedlog Odluke utvrdila je Komisija za izbor i imenovanja.

Daliborka Milović je obrazložila izvještaj Komisije za izbor i imenovanja.

U raspravi nije niko učestvovao.

Na osnovu rezultata glasanja, predsjedavajuća je konstatovala da je Dom naroda Parlamenta Federacije, sa 35 glasova za, uz osam glasova protiv i uz tri uzdržana glasa donio Odluku o izmjenama Odluke o izboru predsjednika, zamjenika predsjednika i članova radnih tijela Doma naroda Parlamenta Federacije BiH kojom su u Odbor za denacionalizaciju i privatizaciju za članove izabrani Zoran Jovanović i Mustafa Kurtović umjesto Sladana Ilića i Zahida Bašića, a u Odbor za obrazovanje, nauku, kulturu, sport i pitanja mladih izabran Zoran Jovanović umjesto Mire Ljubijankić.

Dom naroda je na prijedlog Komisije za izbor i imenovanja usvojio sljedeći:

## ZAKLJUČAK

Zadužuju se predsjednik i potpredsjednici Federacije BiH i Vlada Federacije BiH da u skladu sa svojim ustavnim i zakonskim nadležnostima hitno izvrše potrebna imenovanja u svim tijelima u kojima je mandat članova istekao i dostavi ih Parlamentu Federacije BiH na potvrđivanje.

Sjednica je završena u 18.25.

\* \* \*

Transkript sjednice čini sastavni dio Zapisnika.

SEKRETAR

Izmir Hadživdić

PREDSJEDAVALA

Karolina Pavlović